



UPA 2019/215 aamma 216

Ulloq26-03-2019

Múte Bourup Egede

Uunga siunnersuut: Aningaasanik nuussinerni paasissutissat ilanngullugit nassiunneqartussat pillugit Kalaallit Nunaannut Inatsit pillugu siunnersuummut Namminersorlutik Oqartussat oqaaseqaataannut Inatsisartut aalajangiiffigisassaattut siunnersuut.

Uunga siunnersuut: Aningaasanik peqquserluutinik malunnarunnaarsaasarneq pinerliiniarnernillu aningaasalersuisarneq pinaveersimatinnissaannut inatsisip Kalaallit Nunaannut atuutilersinnera pillugu peqqussut Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut.

(Inuussutissarsiornermut Nukissiuuteqarnermullu Naalakkersuisoq)

Unneqaserluttumik aningaasanik, pinerliiniarnermik allatigulluunniit iliuuseqarneq akiorniagassaavoq assortuuffiusariaananilu.

Taamatutaaq ippoq Naalakkersuinikkut suliaqarnermi innuttaasut pissaanermik paarinnittut uagutsinnut pisussaaffiliussaannik unneqqaserluttumik inatsisinillu uniuusumik ingerlasoqannginnissaanik qulakkeerinnittussaanitta assortuussutaasariaqannginnera. Eqquutsiinnagassagaarput uniuoqarsimappat kinguneqartitsisoqarnissaa. Pissaanermi inuiaat uagutsinnut pisussaaffiliussaas najumminiaannarlugu inatsisinik pisussaaffiliunneqarsimasunillu kinguneqartitsinnginneq unneqqaserlunnerummat. Pissaanermik pisussaaffimmillu uagutsinnut 'attartortinneqartumut' atonerluinerummat.

Innuttaasunut unneqqarissumik inatsisinillu malinnilluni ingerlasoqarnissaanik sinaakkusiornissamik suliaqartuusugut, suliaatta tatiginassutsittalu illersorneqarsinnaasumik ingerlanissaannik anersaaqarluta suliaqarnitsinni maligassiulluartuusariaqarpugut. Uniuoqaraangat inatsisinik kinguneqartitsisassalluta – Tamattami inatsisit ataani inuugatta.

Naalakkersuisut uani immikkoortut qaqitaat tunngaviatigut taperserlugit ataatsimiitsitaliamut susassaqtumut ingerlateqqippagut.

Taamaattorli Naalakkersuisusunut sakkortuumik kaammattuutigerusupparput danskit Naalakkersuisuinut ersarissassagaat nunatsinni inatsisit atuutsinniarneqartut Inatsisartuni Folketingimilu sammineqassatillugit, soorunami nunatsinni Inatsisartuni sammineqaqqaartarnissaat pingaaruteqartoq. Taamaalilluni aamma danskit isummernalernermi tunngavissagissaarlutik isummersinnaanerat tunngavissagissaarnerussammat. Minnerunngitsumillu Namminersorneq Pillugu Inatsimmi tamanna aamma ersarilluinnartumik Kapitel 5 §17-imi aaliangersarneqarnikummat. Tassa nunatsinni isummertoqaqqaartarnissa Folketingimi aalianginnginnermi pisassasoq.

Uani suliaq taamaanngilaq pinartuummalli taamak tuaviorunneqarsimasoq oqariartuutigineqarluni. Tamanna tusaatissatut tiguarput.

Taamaattorli Inuit Ataqatigiit uuma suliap kingusinnerusukkut assilillugu pisoqaqqinnginnissaa kissaatigaarput. Nunatut akunnitsinni isumaqatigiissutigut ataqpeqatigiilluta naligiillutalu ingerlatassagut avaqqutaaruminaammata.